

Pirimonihopi Utipiho

Kimandi Pirimonihomi Utipimandapi Nesipihande

Pirimoniho so aunahipati Korosihandaahapihore. Iyataati ko kahapaamapipa apipaahi asaketahore. Siyahondaahandi kandi ko Autaahaatihopi giwunyaahore. Iyataati ko Pirimoniho so Poriho otipipatihyaami womi ambipati Onesimaasihomi naisoho akohore. Aihi ko Onesimaasiho Pirimonihoai maariho biyati namunyati koai usesi yanihimataise. Siyati yanihimasihi ami isihiya usa koai usonawaawi nepi koai napwitopipihi napuhauhi napundataise. Konihi napundihi Poriho koai usonataise. Usonataati koai Awaisiho Jisasi Kiraisihomi piwiha kaundati nunjataise. Aihi ko Onesimaasiho piwiha atisati neti giwunyaataati noaipati Awaisihomihomatataise. Poriho gwinyaataati Onesimaasiho japihi noti Pirimonihoai iwinjahonihi maariho naasohitanihi maasi napaisaati bimitaatimihandapi Poriho utipihandi kimandi kaundati jipatipiyahande. Poriho Romihanda napwitati bindataati kinaungwiha 60 A.D. hura kimandi utipimandi jipatipiyahande. Kima piwimaami napimasaati yatihepi windi ahimaayo, owetise. Sandi apaapimahe, kimandi utipimandami piwiha windi utaarihaametati nuhihaatihe. Isi piwiha nuhihaasi kaami mitiho yiyandihi ahiyotiha awitapaapi keti gihunyaatati nangesipatitaise.

Kimo Utipiho Poriho Pirimonihopi Jipatipiyati Nusoaasisihore

¹ Nini Porihonini Kiraisi Jisaasihomi otipipatapi naanjihaiwa neti napwititi bimohihoninithi ami nyami naisoho nyamatiyati Kiraisihopi giwunyaati komi otipipati kawisiho Timotehotihi utipiho kimo jipatipiyaha nusoaasihaayo kinyi Pirimonihonji nyami naisohonji Kiraisihomi otipipati nyangisapi maasi kaingihonyapo. ² Iyaha ami yahuraanyami naisaamaati Apiyaahaatapuni ami Arikipusiho Autaahaatihomi pwisipi yaipati neti isiwatata kapaaraahi nyamihihooanapi otipipati nyangisati maasi kaisihopuni ami Autaahaatihomi isihiya Kiraisihopi giwunyaahohiyihiya kinyi anjipipihi napiwi gisoniwi maasi Autaahaatihomi ambipati niwimaapi bimohiyihiyaapuni jipatipiyahaayo.

³ Isi nyami Apiho Autaahaatihouni ami Awaisiho Jisasi Kiraisihouni sangisi gaahati kasimi jatatamasaihi sami maariho napaisaatitanihi bimaawise.

Pirimoniho Gaahati Kaihi Poriho Maaritindihandapihaare

⁴⁻⁵Nahateweti nini Autaahaatihopi gaapundataahura kinyapimaawi gihunyaati ami otipipati gaahati kinyi kaingitihandapi Autaahaatichoai kinyi gaahonje gaare undataato. Nini saindi kiyohitimandi apaapimaawe. Kinyi Kiraisihoai maariho baimbi nunyapi ami kopi giwunyaapi ami isihiya Autaahaatihomihya nahatiyaisi maariho napaitipi numwingitihandapi isihiya nahateweti siyahoe siyahoe ndauhi atisataate. ⁶Kinyi nyamataimbi Jisasi Kiraisihopi giwunyaahingitihandaahi timaamaitaati naisihiyaanimatihaayo. Aihi nini sandapi Autaahaatihopi gaapundataayo Kiraisihopi giwunyaawaati koaisaati maasi timaamaitonih ko gwinyaitihaahaiwa gaahaiwa nyangi nanyamiwaiwa Autaahaaticho neti waati ginyunyaahonih waati nyangisi ginyunyaatitanda. ⁷Nisi naisohonji nisataimbi Kiraisihopi giwunyaahingihonye, kinyi Autaahaatihomi isihiya nahatiyaisi maariho napaitipi numwingitihandapi nini waati maarititi ami nisi maariho biyati nga winitihati kiyapaise. Saimbi kiyaisi maariho numwingitimandi kiya Autaahaatihomi isihiya maarititaatiwihati gaahati kinyi kiyapaise.

Pirimoniho Onesimaasihoi Nisi Naisohonje Undati Japihi Numwaitandihandapihaare

⁸Kinyi kimandi kaitaapi nini gwinyaataati Kiraisihomi ambipataahi kahititandiyoni kaitaape. O ami kinyi gaahaiwa kaingiwaiwaapaahi aimi mmoniti gwinyaatihonine. ⁹Isi nini saimbi kaime ndi watipindi kahitataamaato. Owe. Nehi saimbi kaime ndi nangiseniti napaisaati kahitataato. Nini Porihonini Kiraisi Jisaasihomi piwiha nesi kandunjohihonine. Aihi nini saindi Kiraisihomi piwiha awusoahohitihandapi wani kimura nini yaasati naanjihaiwa neti napwititi bindataayo. ¹⁰Aihi nini gisi nangiseniti kahitataato kinyi nisi maasihoho Onesimaasihoi ahosumwapi pohipimaawimbi gaahati kawimbi numwaitaapo. Onesimaasiho so nini napwititi bimonih ko nasati ningisi nisonataise. Aihi nini koaisi Kiraisihomi piwiha kandunjonih ko atisati akitinihi Kiraisihopi giwunyaasitihandaahi nisi maasihoho akohore hititi kahitataato. ¹¹Jihi ko Kiraisihopi sangi giwunyaasura kinyi otipipati biyati nga windi kamaahise. O ami wani kimura giwunyaasurimura gisuni ami ningisuni anditinyiwati nyatatamanati otipipati nga kaitaise.

¹²Aihi nisi maariho komiheti ahotih kinyapi koenda japihi numwe unditi nandusaasonih wani nasataise. ¹³Nini Kiraisihomi piwiha gaaha wanihaapi yaasati naanjihaiwa neti napwititi bimohurimura koaisi saunditi, kinyi Pirimonihome aunahipati nepi ningisi nitatamanipi anditinipi otipipati kimbih ningisapi bindapaapi kaime unditi

nimbipuwitihati kati owe. ¹⁴Kinyi ningisi nitatamanipi anditiniwitaapi watipindi kandaamaato. Owe. O ami kinyi ningisi nitatamanitaapaahi ami kinyi kiwahoŋi gwinyaahingirihireti kaimbi nitatamanitaape. O ami kinyuni ami ninuni maariho naasohitanihi gaasi siyaha kaitihaawo nnihaawaahi ami kira kaitihaawe.

¹⁵Sandi siyati noaipataise. Onesimaasiho masihonji gisi nangimataise. Isi kinyi koaisi japihi numwaape ko gisati maasi apipaahi konihi bimitando. ¹⁶Wani kimura kopi nisi nehi otipipatiho nawiho nameti otipipati kanisihoe tipi windi kinyi usonipi gimunyaape. Owetane. Iyataati ami ko kinyi nehi otipipatihondaahandi kandi koaisi kinyi baimbi akitinihi maariho nunye. O ninihi ko Kiraisihopi giwunyaasitihandaahi nisi naisoho akohore ndi gwinyaati usonataayo. Isi ami gisangi ko nisi nehi otipipatiho nawiho namehati kanisahoe tipi usondaise. Iyataahandi kandi Kiraisihopi ko giwunyaasitihandaahi nisi naisoho akohore tipi usonipi maariho napaitipi numwitaape.

¹⁷Isi kinyi nisapi koaisiha Kiraisihomi otipipati maasi timaamaitiha kiyohihoe tipi nisonipi gwinyaapaapaahi Onesimaasihoai japihi maaritipi numwaape, ami ningisangi naasikati kaimbi maaritipi nanimaitaimbo. ¹⁸Iyataati ami ko kinyi wapa neti nangosasati ami wapa nangehonaahi ko nangeti ami nangosasimbipaapi windi namaahimitaisi gaasi nini kapaapi nahimitaani nisi ambipati ahiyapinose. ¹⁹Nini Porihonini titihi nisi ikwiraahi jipatipaindi gisi sandi kahitataato: Ko kinyi wapa nangeti ami nangosasonaahi ami kapaapi nini nanipimatihapa nahimitaano hitataato. Iyataati nini nga gisi sahititi kahitataataahi titihe nisi otipipataahi Autaahaatihomi piwiha kahitonihini kinyi Kiraisihopi giwunyaapi asitimatitaapihandi nepihoniso. ²⁰Isi nisi naisohone atinime. Awaisihomi ambipataahi nini kahitohima atimbi kaime. Sandi yahuraŋi Kiraisihomihuraŋisi kinyi katohirihireti atimbi kiyapaapaahi nisi maariho biyati winititaise.

²¹Nini piwiha kima kahititi jipatipiyohima ko nisi kaundorihireti japepilirati kaitaiso ndi baindi gwinyaataati kahititi jipatipiyataayo. Onesimaasihoai gaahati kawimbi gerundipi japihi numwaapaapaahi nini gisi saimbi saimbi kaimehititi nangiseniti kahitohiwimaiwa nusatipihapaapi waati kaitaise. ²²Ami kinyi saimbi kiyapaapi ami aŋaŋi waŋi nisapi nepi nimane. Sandi katotimandi Autaahaatiho kiyaami gaapundotihandi atiwisati ningisi neti natanoaasonihini gisenda napito ndi waati gwinyaataati kasatataato.

**Isihiya Porihonaisawi Maasi Otipipati Kiyohiyihiya
Pirimonihoai Ipihirete Undawaatopo**

²³Epapiraasiho gisi ipihirete hitataase. Ami ko ningisati maasi napwitihaha bindihaayo. Iyaha maisihoanyangi ami Kiraisihomi piwiha

ausaahohitihandapinyatiwi nepi nanyapuhauhi napwitihā bindihaayo.

²⁴Ami ningisawi maasi Kiraisihomi otipipati kiyohiyihiya Maakiho
ami Arisitakusiho ami Demaasiho ami Rukiho siyaari gisi ipihirete
hitawaatopo.

²⁵Jisasi Kiraisiho gisi komi gaahandi kahisati nahinyane.